

**Акафист великомученику и
целителю Пантелеймону**

Акафист великомученику и целителю Пантелеймону

Кондак 1

Избранный страсотерпче Христов и врачу благодатный, туне подай недугующим исцеления, песньми восхваляем тя, заступника нашего. Ты же, яко имей дерзновение ко Господу, от всяких бед и болезней свободай нас, любовьи тебе зовущих:

Радуйся, великомучениче и целителю Пантелеймоне.

Икос 1

Ангела земнаго и небснаго человека вемы тя, славный Пантелеймоне: ангельскою бо непорочностию и мученичеством украшен, преселился еси от земли на Небо, идеже со Ангелы и всеми святыми предстои Престолу Господа славы, молися о нас, земных, почитающих тя звании сими:

Радуйся, светлосте благочестия;

радуйся, преславный светильниче Церкви.

Радуйся, мучеников пречестных украшение;

радуйся, верных в непоколебимом терпении утверждение.

Радуйся, юности преизрядная похвало;

радуйся, поборниче Христов, в мужестве неодоленный.

Радуйся, произрастший в мире, премирен явивыйся;

радуйся, ангеле во плоти, превосходяй смертных.

Радуйся, небожителю всеблаженный;

радуйся, Божественного разума вместилище.

Радуйся, имже вера возвысися;

радуйся, имже прелесть низложися.

Радуйся, великомучениче и целителю Пантелеймоне.

Кондак 2

Видя тя Владыка сосуд избран, возлюби души твоя доброту. Ты бо земную всякую сладость и славу презрев, венцем мученическим возжелел еси украситися, уязвлен Божественною любовью, и вдохновенно поя: Аллилуия.

Икос 2

Разум богодухновен имея, о доблий воителю Пантелеймоне, изумил еси царя Максимиана мужеством души твоея и словесы, имиже дерзновенно проповедал еси Христа. Темже похваляюще дерзновение твое, глаголем ти сице:

Радуйся, угрозы Максимиана презревый;

радуйся, советом нечестивых не покоривыйся.

Ра́дуйся, насаждение истиннаго богопочитания;
радуйся, искоренение демонскаго служения.
Ра́дуйся, неистовства мучителей изобличителю;
радуйся, идольския прелести низложителю.
Ра́дуйся, разгнавый нечестивых соборища;
радуйся, пременивый тленная на небесная.
Ра́дуйся, собеседниче невещественных Ангелов;
радуйся, сликовствователю многотрадальных святых.
Ра́дуйся, имже сатана посрамися;
радуйся, имже Христос прославися.
Ра́дуйся, великомучениче и целителю Пантелеимо́не.

Кондак 3

Си́лою Вышняго, дарованною тебе, и крепким терпением твоим обезсилил еси мучителю дерзость, мужественный победоносче: огня, зверей, колеса не убоявся и мечем усечен во главу, венец победы приял еси от Христа Бога, взывая Ему: Аллилу́ия.

Икос 3

И́мущи обитель твоя вседрагую главу твою, богомудрый страсотерпче, яко превеликое сокровище, радости исполняется о сем, и любовию воспевающи данную тебе от Бога благодать исцелений, благодарно зовет ти:

Ра́дуйся, Никомиди́и светильниче всесветлый;
радуйся, чтущей тя обители страже неусыпный.
Ра́дуйся, имже охладе безбожие;
радуйся, имже возрасте богопознание.
Ра́дуйся, светлая страсотерпцев славо;
радуйся, радостное православных слышание.
Ра́дуйся, исцелений благодатный источниче;
радуйся, дарований великих вместилище.
Ра́дуйся, благовонное миро, облагоухающее души;
радуйся, яко помогаеши призывающим тя.
Ра́дуйся, слепым зрение даровавый;
радуйся, хромым благошествое устроивый.
Ра́дуйся, великомучениче и целителю Пантелеимо́не.

Кондак 4

Бу́рею помышлений многобожия одержим, нечестивый царь смутися, уведев от завиствовавших тебе врачей, яко всякия неисцельныя недуги целиши ты именем Христа. Мы же, с веселием славяще дивнаго в тебе Бога, вопием Ему: Аллилу́ия.

Икос 4

Слы́шавше никомидийстии людие о великом сострадании твоём к страждущим и о безмездном врачевании от всяких болезней, устремишася вси к тебе, с верою во врачующую благодать, в тебе сущую, и приемлюще скорая исцеления от всяких болезней, прославляху Бога и тебе величаху, всемилостиваго целителя своего, зовуще ти:

Ра́дуйся, помазанный миром благодати;

радуйся, храме Бога освященный.

Радуйся, великая благочестивых славо;

радуйся, твердая озлобляемых стено.

Радуйся, мудрых превосходяй разумом;

радуйся, верных осиявай мысли.

Радуйся, Божественных даров приятелище и многообразных нам милостей Господних источниче;

радуйся, скорый помощниче страждущим.

Радуйся, обуреваемых пристанище;

радуйся, заблуждших наставниче.

Радуйся, болящих туне врачуй;

радуйся, обильно исцеления источай.

Ра́дуйся, великомучениче и целителю Пантелеймоне.

Кондак 5

Чудо преславное сотвори с тобою Господь, егда чрез служителя Своего Ермолая призва тя в чудный Свой свет. Ехидною бо великою угрызенно умершее отроча по молитве твоей ко Христу абие оживе и воста здраво. Познав убо Жизнодавца всех Истиннаго Бога, с твердою верою воззвал еси Ему: Аллилуия.

Икос 5

Узрё свет слепый, емуже с призыванием имене Христова прикоснулся еси ты, славне. Ермолаем бо пресвитером просвещен, отринув отеческое многобожие, восприял еси матернее благочестие, имже и отца просветил еси. Сего ради тебе, славному угоднику Божию и чудному врачу, взываем:

Ра́дуйся, к Богу велие рачение имеяй;

радуйся, присногорящий огню Божественных любве.

Радуйся, деятельный послушателю священных поучений Ермолая;

радуйся, последовавший советам матери твоея Еввулы.

Радуйся, яко вся раздал еси, да Христа приобретаеши;

радуйся, любовь к миру любовию Божию победивый.

Радуйся, яко вместо сладких мира за Христа лютаго страдания приял еси;

раду́йся, яко общник сотворился еси Страстем Христовым.
Раду́йся, восторжествовавший над всеми страстьми;
раду́йся, украсивыйся благодатным безстрастием.
Раду́йся, исполняяй радости притекающия к тебе;
раду́йся, туне исцеляяй всех благодатию Христовою.
Раду́йся, великомучениче и целителю Пантелеимо́не.

Кондак 6

Проповедник истины явился просвещенный тобою телесне и душевне слепец: подобно бо евангельскому слепцу, дерзновенно пред всеми исповеда Света Истиннаго Христа, просвещающа всякаго человека, нечестиваго же царя и боги языческия укорив, чрез мечное усечение взыде к немерцающему свету на Небеси пети Богу: Аллилу́ия.

Икос 6

С свѣтлым лицѣм представ судилищу цареви, дерзновенно взывал еси, преблаженне, во услышание всех: всецелбная сила моя и слава Христос есть Истинный Бог, Владыка всех, мертвыя воскрешаяй и всяк недуг отгоняяй. За таковое исповедание ублажающе тя, глаголем:

Раду́йся, уста громогласная Божества Христова;
раду́йся языче медоточный, вещаяй Его домостроительство.
Раду́йся, ветие превысшаго Богословия;
раду́йся, сеятелю мудрый благочестия.
Раду́йся, сладкозвучная веры свирель;
раду́йся, славный проповедниче Православия.
Раду́йся, прежде смерти явивый дивная;
раду́йся, по смерти совершаяй чудная.
Раду́йся, зрителю славы Христовы;
раду́йся, послушателю молящихся тебе.
Раду́йся, подателю милости тоя требующим;
раду́йся, ходатаю благ почитающим память твою.
Раду́йся, великомучениче и целителю Пантелеимо́не.

Кондак 7

Миро излился на душу твою, богомудрый целбниче, от Утешителя Духа; темже по смерти честныя останки твоя, благоуханием своим страстей злосмрадие отгоняя, исцеление подают вопиющим верою Богу: Аллилу́ия.

Икос 7

Егда узреша идольстии чтители многолетна расслабленна, молитвою твоею, святе, воздвигнута и ходяща, мнози увероваша во Христа; жрецы же бесовстии, завистию снедаеми, подвигоша царя на ярость. Тебе убо нещадно за Христа стружему и опаляему бывшу, со умилением зовем:

Ра́дуйся, наслаждения земная презревший;
радуйся, благ вещественных превысший.
Радуйся, яко вся красная мира сего ни во что же вменил еси;
радуйся, яко славу скоротекущую с себе отрясл еси.
Радуйся, неуловим пребывый ловлении Велиара;
радуйся, победивый мучителей коварства.
Радуйся, не пощадивый за Христа жизни своя;
радуйся, враг явивыйся враждебныя плоти.
Радуйся, многобожия широту утеснивший;
радуйся, Божественною силою идолы поправый.
Радуйся, острейшая стрело, язвящая враги;
радуйся, предстателю, заступаяй верующия.
Ра́дуйся, великомучениче и целителю Пантелеимоне.

Кондак 8

Странноле́пно являшеся тебе Господь, ободряя и соблюдая в мучениях за имя Его: во образе бо пресвитера Ермолая, клокочущее олово, в неже ввержен был еси, охлади, и в мори отрешив велий камень от выи твоя, изведе неврежденна на землю. Ты же, паки представ пред царя, торжественно пел еси Христу Богу: Аллилу́ия.

Икос 8

Весь умне на Небеси водворяся, и низу на земли сущих не оставляеши, сопребывая с нами всечестною главою твоею, великий страсготерпче Христов, приемля от Господа и подая просвещение и освящение вопиющим тебе таковая:

Ра́дуйся, премудросте Божественныя исполненный;
радуйся, промышления Божия о нас таинниче.
Радуйся, богомудренных умов услаждение;
радуйся, боголюбивых душ увеселение.
Радуйся, пресветлый Христов бисере;
радуйся, освященный душею и телом.
Радуйся, во дворех перворожденных на Небеси вселившийся;
радуйся, в присноблаженных обитаяй чертозех.
Радуйся, света Троическаго зрителю;
радуйся, в молитвах к Богу теплый о нас предстателю.
Радуйся, просвещение душам подаваяй;
радуйся, скорбящим утешение ниспосылаяй.
Ра́дуйся, великомучениче и целителю Пантелеимоне.

Кондак 9

Всякое естество удивися, Пантелеимоне, сиянию в тебе благодати и

богатству добродетелей: ангелоподобней чистоте твоей, великому мужеству в лютых страданиях, крепкой любви ко Христу и многому состраданию к людям, в нихже твориши преславная, во еже пети: Аллилуия.

Икос 9

Ветія многовещанныя не возмогут по достоянию восхвалити борения твоя, славный добропобедниче, како непобедимую силою Божиею, юный леты сый, победил еси древняго и исконнаго врага и посрамил еси идольскую прелесть. Мы же, удивления исполненнии, зовем ти:

Ра́дуйся, радостное зрелище Ангелов;

радуйся, благоговейное удивление человеков.

Радуйся, кровь за Христа излиявый и в смерти млеко источивый;

радуйся, тело за Него мученической смерти предавый.

Радуйся, исповедничества правило;

радуйся, доблий воине Царя царей.

Радуйся, тьмы державца победивый;

Радуйся, победою твоею небесных и земных обвеселивый.

Радуйся, горняго мира обитателю блаженный;

радуйся, дольняго мира мудрый странниче.

Радуйся, древо, украшенное плодами благодатных дарований;

радуйся, носяй добропобедныя ветви.

Радуйся, великомучениче и целителю Пантелеимоне.

Кондак 10

Сострадания исполнен, яко истинный подражатель Подателя милости Господа, честный страдальче, Пантелеимоном (си есть, всемилостивым) от Него проименован еси, на вся притекающая к тебе милость изливая, юже и нам неоскудно источай, о тебе вопиющим Богу: Аллилуия.

Икос 10

Стену ты твердо обрет мучитель, никкими же муками победиму, покусися сокрушити крепость твою зубы зверей и остриями мучилищнаго колеса, обаче и в сем ничтоже успе: сила бо Христова лютость зверей укроти, а страшное коло, на немже обращено бе тело твое, абие сокрушися. Тебе убо непобедимому страстотерпцу зовем:

Ра́дуйся, честное Христово избрание;

радуйся, непорочное Богови благоухание.

Радуйся, твердый адаманте Церкви;

радуйся, непоколебимый столпе, досязаяй до Небесе.

Радуйся, звери видимыя укрощаяй;

радуйся, драконов невидимых сокрушаяй.

Радуйся, обогранный твоею за Христа кровию, срастворенною млеко;
радуйся, неувядаемая приемый венцы.

Радуйся, радость даровавый Ангелом и человеком;

радуйся, прославленный Богом на Небеси и на земли.

Радуйся, небожителю, ликовствуяй с мученики;

радуйся, насыщаяйся лицезрением Христа пресладким.

Радуйся, великомучениче и целителю Пантелеимоне.

Кондак 11

Песнь исходную приносим твоему за Христа заклению священному, в немже вместе с кровию млеко истече от тебе, великомучениче, и масличина, под неюже усечен был еси, исполнися целительных плодов. Темже Христу, дивно прославляющему славящия Его, тепле вопием: Аллилуия.

Икос 11

Светозарная луча был еси, богомудре, во тьме многобожия сидящим, путеводящая к Солнцу Правды Христу Богу, Емуже молися во свете заповедей Его присно пребывати и нам, сицевая радостная тебе приносящим:

Радуйся, пресветлая звездо, на мысленной тверди блистающая;

радуйся, луча, христоименным людем светящая.

Радуйся, таинственно облистываемый от Солнца Христа;

радуйся, умне землю обтекаая.

Радуйся, селение красное Пресвятаго Духа;

радуйся, сосуде пречестный, изливаяй исцеления.

Радуйся, чистоты сокровище;

радуйся, милости тезоимените.

Радуйся, Царствия Небеснаго наследниче;

радуйся, вечныя славы сопричастниче.

Радуйся, предстателю бедствующим в мори житейстем;

радуйся, безсребренниче, помогай призывающим тя с верою.

Радуйся, великомучениче и целителю Пантелеимоне.

Кондак 12

Благодати обилие приял еси, преблаженне, по обилию любви твоея ко Христу Богу, Иже и яви тя многоцелебным источником, безмездно врачующим душевныя и телесныя болезни притекающих к тебе с верою и Богу вопиющих: Аллилуия.

Икос 12

Поюще многострадальныя подвиги твоя за Христа, славный стратотерпче, хвалим долготерпение твое, ублажаем мученическую

кончину, почитаем и священную память твою, заступниче наш и целителю, и в похвалу сицевая тебе зовем:

Ра́дуйся, благочестия трубо благозвучная;
раду́йся, мечу, посеща́й нечестие.

Раду́йся, строганный на древе за Распростершаго руце Свои на древе Крестнем;

раду́йся, яко опаляемъ за Него, прелести пещь угасил еси.

Раду́йся, язвами твоими враги уязвивый;

раду́йся, кровию твоею токи идольския крове изсушивый.

Раду́йся, в кипящее олово вверженный за Христа;

раду́йся, погруженный за имя Его в водах морских.

Раду́йся, промыслием Божиим неврежден в сих пребывый;

раду́йся, яко чрез огонь и воду мучения вшел еси в покой небесный.

Раду́йся, изливаяй неизсякаемыя струи милости верным;

раду́йся, благосострадательный врачу, исцеления благодать подаваяй.

Раду́йся, великомучениче и целителю Пантелеимоне.

Кондак 13

О многострада́льный и предивный страсотерпче Христов и целителю наш Пантелеимоне! Милостиво прием сие малое от нас приношение, от многообразных недугов исцели ны и предстательством твоим сохрани от враг видимых и невидимых, и вечнаго мучения избавитися нам Господа умоли, да во Царствии Его вы́ну воспоем: Аллилу́ия.

Сей кондак глаголется трижды.

И паки чтётся 1-й икос и 1-й кондак:

Икос 1

А́нгела земнаго и небеснаго человека ве́мы тя, сла́вный Пантелеимоне; а́нгельскою бо непоро́чностью и мученичеством украше́н, пресели́лся еси от зе́мли на Не́бо, иде́же со А́нгелы и все́ми святы́ми предсто́я Престо́лу Го́спода сла́вы, моли́ся о нас, земных, почита́ющих тя зва́нии сими:

Раду́йся, светлосте благоче́стия;

раду́йся, пресла́вный свети́льниче Це́ркви.

Раду́йся, мучеников пречестных украше́ние;

раду́йся, верных в непоколебимом терпении утвержде́ние.

Раду́йся, юности преизрядная похвало;

раду́йся, поборниче Христов, в мужестве неодоле́нный.

Раду́йся, произра́стший в ми́ре, премирен явивыйся;

раду́йся, а́нгеле во плоти, превосходя́й сме́ртных.

Раду́йся, небожителю всеблаже́нный;

раду́йся, Боже́ственного ра́зума вмести́лице.

Ра́дуйся, и́мже ве́ра возвы́сися;
ра́дуйся, и́мже прелесть низложися.
Ра́дуйся, великому́чениче и целителю Пантелеи́моне.

Кондак 1

Избра́нный страстоте́рпче Христо́в и врачу́ благодáтный, ту́не пода́й недугующим исцеления, пёсньми восхваляем тя, заступника нашего. Ты же, я́ко имей дерзнове́ние ко Го́споду, от всяких бед и болезней свободáй нас, любви́ю тебе зовущих:

Ра́дуйся, великому́чениче и целителю Пантелеи́моне.

Молитва

О вели́кий Христо́в уго́дник и пресла́вный целёбник, великому́чениче Пантелеи́моне! Душе́ю на Небеси́ Престо́лу Божию предстоя́й и триипостасны́я Его славы наслажда́йся, телом же и ликом святы́м на земли в Божественных храмах почива́й и данную ти свыше благодати́ю различна́я чудеса источа́й, призри милостивным твоим оком на предстоя́щая люди, честней твоей иконе умильно моля́щиеся и прося́щая от тебе целебны́я помощи и заступления: прости́ ко Го́споду Богу нашему́ теплы́я твоя моли́твы и испроси душам нашим оставление согрешений. Се бо мы, за беззакония наша не смею́ще возвести очеса́ наша к высоте́ небесней, ниже вознести глас молебный к Его́ в Божестве непреступней славе, сердцем сокрушенным и духом смиренным тебе, ходата́я милостива ко Влады́це и молитвенника за ны, грешны́я, призываем, я́ко ты прия́л еси́ благодать от Него́ недуги отгоня́ти и страсти исцеля́ти. Тебе убо просим: не презри нас, недостойных, моля́щихся тебе и твоя́ помощи требующих. Буди нам в печалех утешитель, в неду́зах лю́тых страждующим врач, напастуемым скорый покровитель, очесем недугующим прозрения датель, ссущим и младенцем в ско́рбех готовейший предстатель и исцелитель: исходата́йствуй всем вся, я́же ко спасению́ полезная, я́ко да твоими́ ко Го́споду Богу моли́твами получивше благодать и милость, прославим всех благих Исто́чника и Дароподателя́ Бога, Еди́наго в Троице́ Святей слави́маго Отца́ и Сына́ и Свята́го Ду́ха ны́не и присно́ и во веки веков. Ами́нь.